

Kes positif kembali melebihi 20,000 kes

Sejumlah 1,005 pesakit sedang dirawat di ICU dengan 464 daripadanya memerlukan bantuan alat pernafasan

Oleh MUHAMMAD AMNAN HIBRAHIM

SHAH ALAM

Kes baharu Covid-19 di Malaysia kembali meningkat melebihi 20,000 kes apabila merekodkan sebanyak 20,897 kes pada Selasa.

Ketua Pengarah Kesihatan, Tan Sri Dr Noor Hisham Abdullah menerusi hantaran di akaun Twitter beliau berkata, jumlah yang dilaporkan itu menjadikan jumlah kumulatif kes positif Covid-19 di Malaysia kini mencecah 1.75 juta kes.

"Selangor mencatatkan jumlah kes tertinggi dengan 4,371 kes diikuti Sabah (2,594), Sarawak (2,285), Johor (2,159) dan Kedah (1,942) dan Pulau Pinang (1,732)," katanya.

Menurut beliau, tiga lagi negeri yang merekodkan kes melebihi 1,000 ialah Kelantan (1,479), Perak (1,204) dan Kuala Lumpur (1,003) manakala negeri yang merekodkan

tiga angka melibatkan Pahang (798), Terengganu (608), Melaka (417) dan Negeri Sembilan (215). Perlis pula merekodkan 64 kes diikuti Putrajaya (24) dan Labuan (satu).

Dr Noor Hisham dalam kenyataan pada Selasa memaklumkan daripada keseluruhan kes baharu itu, sebanyak 422 kes atau dua peratus adalah daripada kategori tiga, empat dan lima manakala sebanyak 20,475 kes atau 98 peratus lagi adalah terdiri daripada kategori satu dan dua.

Katanya, secara keseluruhan, sebanyak 15,371 kes atau 73.6 peratus daripada jumlah kes baharu yang dilaporkan pada Selasa adalah individu yang tiada atau tidak lengkap vaksinasi.

Sementara itu, beliau berkata, jumlah pesakit pulih ialah sebanyak 18,465 kes menjadikan jumlah kumulatif kes sembuh kepada 1,461,727 kes dengan kes aktif kini adalah 267,863 kes.

Dr Noor Hisham juga memaklumkan bahawa sejumlah 1,005 pesakit sedang dirawat di unit rawatan rapi (ICU) dengan 464 daripadanya memerlukan bantuan alat pernafasan.

Katanya, negara merekodkan

sejumlah 282 kematian baharu pada Selasa melibatkan 238 warganegara dan 44 bukan warganegara dengan kes kematian di luar hospital atau *brought-in-dead* (BID) adalah sebanyak 98 kes.

Katanya, kes kematian yang berlaku melibatkan 139 kes di Selangor diikuti Johor (53), Kuala Lumpur (21), Sabah (15), Pulau Pinang (12) dan Kedah (11).

Kelantan merekodkan sembilan kes kematian pada Selasa dengan Pahang (tujuh), Melaka (lima), Negeri Sembilan dan Perak masing-masing tiga kes, Terengganu (dua) manakala Perlis, Sarawak dan Putrajaya adalah satu kes.

Dalam pada itu, katanya, sebanyak 22 kluster baharu dikesan pada Selasa dengan 11 daripadanya melibatkan tempat kerja, lapan komuniti, dua kluster berisiko tinggi dan satu kluster pusat tahanan.

Dr Noor Hisham berkata, berdasarkan data terkini, nilai kebolehhangkitan Covid-19 atau R-Naught (Rt) Malaysia pada Isnin adalah 1.02 dengan Perlis mencatatkan nilai RT tertinggi iaitu 1.22 diikuti Sarawak (1.19) dan Sabah (1.12).

Jangan terlalu leka, varian Delta masih ganas

KUALA LUMPUR - Rakyat Malaysia khususnya mereka yang lengkap divaksinasi tidak harus terlalu selesa dan leka sehingga mengabaikan pematuhan prosedur operasi standard (SOP) serta kawalan sendiri bagi mengekang penularan Covid-19.

Ini berikutan, wabak itu masih merebak malah muncul dengan pelbagai mutasi lebih ganas terutama varian Delta yang diklasifikasikan oleh Pertubuhan Kesihatan Dunia (WHO) sebagai varian membimbangkan (VOC).

Presiden Persatuan Pakar Perubatan Kesihatan Awam Malaysia, Datuk Dr Zainal Ariffin Omar berkata, rakyat harus faham dan akur walaupun vaksin dibangunkan untuk melindungi diri daripada virus itu, varian Delta masih mengganas bukan sahaja di Malaysia bahkan di seluruh dunia.

"Meskipun kita bakal capai 80 peratus populasi dewasa divaksin atau imuniti kelompok, Covid-19 akan sentiasa ada atau endemik pada paras yang rendah sama seperti penyakit sedia ada yang lain.

"Kita yang divaksin masih berpotensi dijangkiti virus itu, namun kesannya lebih minimum berbanding individu yang tiada perlindungan vaksin.

"Oleh itu, pematuhan SOP dan kawalan sendiri mesti diamalkan untuk lindungi semua orang," katanya ketika dihubungi pada Selasa.

Dr Zainal Ariffin menambah dengan lebih banyak kelonggaran serta pembukaan pelbagai sektor yang diumumkan kerajaan sebelum ini, ia meletakkan tanggungjawab dan kepercayaan kepada rakyat untuk saling melindungi diri daripada wabak berkenaan.

"Walaupun kita divaksin, masih ada lagi golongan amat berisiko mendapat kesan jangkitan yang parah seperti kanak-kanak, individu yang tidak sesuai dengan vaksin serta golongan antivaksin.

"Secara teknikalnya adalah mustahil untuk mendapatkan sifar jangkitan, namun tujuan vaksin ialah mengurangkan penularan dan kesan jangkitan terhadap individu," katanya. - *Bernama*

Sinar Harian 10/09/2021

MEDEPANI KRISIS
COVID-19:
APA TINDAKAN
KITA?



DR NOOR HISHAM